

Thursday, October 16, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

RASHTRIYA POSHAN MAAH 2025

Nu leh naupangin chaw tha an dawn theih nana inzirtirna Rashtriya Poshan Maah 2025 kharna hun chu vawiin khan Aijal Club Park-ah Directorate of Women & Child Development buatsaiha hman a ni a; chawhnu lamah Integrated Child Development Scheme (ICDS) kum 50 tlin lawmna hun hman a ni.

Vawiina hun hmanah hian Aizawl West III bialtu MLA Pu VL Zaithanzama chuan khuallian niin a hmanpui. Poshan Maah chhunga hma la thate hnenah lawmman sem a ni a, khuallian hian Distirct Level Award semin, pakhatna chu Siaha District niin, Serchhip District leh Kolasib District chu pahnihna leh pathumna an ni.

Social Welfare, Women & Child Development secretary Pi Lalzarmawii'n ICDS Project Level Award a sem a; West Phaileng ICDS Project chu pakhatna niin, Bilkhawthlir ICDS Project chu pahnihna an ni a, pathumna chu Thingsulthliah ICDS Project an ni.

Khuallian, Pu VL Zaithanzama chuan Poshan Maah Theme hrang hrang hmangin Mizoram pumah inzirtirna neih a nih thu a sawi a, ei leh in hrisel uar kawnga hmasawnna a awm theihna tura Line Department-te thawhhona chu fakin, tan la lehzual turin a fuih a. ICDS-in kum 50 chhunga hriselna kawnga Mizoram tana a thawh nasat avangin lawmthu a sawi a, ICDS-a thawk tawhte leh la thawk mekte thawhrima fakin tang zel turin a fuih bawk.

Poshan Maah 2025 kharna inkhawmah hian Aizawl Urban ICDS Project leh Tlangnuam ICDS Project hnuaia Anganwadi Centre kal tha leh kal chhuak naupang 10 hnenah Vidhyarambn Certificate hlan a ni.



ICT MINISTER

Vawiin khan Information & Communication Technology Minister Dr. Vanlalhlana leh Software Technology Parks of India (STPI) Director General Pu Arvind Kumar te chu Minister pisa-ah inkawmin, changtlung leh chak zawka Mizorama STPI din a nih theih dan tur chungchang an sawidun a; Director General hi Ministry of Electronics and Information Technology Minister Pu Ashwini Vaishnaw-a leh Mizoram ICT Minister te indawrna bawhzuia Mizorama rawn kal a ni.

He an inkawmnaah hian ICT Minister Dr. Vanlalhlana chuan Mizoram thalai zinga IT kaihhnawiha ngaihtuahna leh thiamna neite leh ei zawng duh ten bul an tan

theih nan STPI hi Mizoramin a mamawh tak a nih thu sawiin, chak taka hma lak a nih theih nan state sawrkar chuan theihtawp a chhuah tur thu a sawi a; STPI chu Aizawl bakah Lungleia din a nih theih dan sawiin Aizawl-a MZU, NIT, NIELIT leh computer application course zirlaite behchhana din a nih theih angin, Lungleiah pawh Mizoram Engineering College, Mizoram Polytechnic Lunglei leh computer application course zirlaite behchhana din theih a nih thu a sawi.



JCM

Joint Civil Society of Mizoram (JCM) hruaitute chuan vawiin khan Aizawl Press Club-ah thuthar thehdarhttute an kawm a; Forest Conservation Amendment Act (FCAA) 2023 a adopt-na sût tura Mizoram sorkar ngenna leh Article 371-G chawinunna atan October ni 17, naktuk (Zirtawp) zanah khian ‘Candle Light Vigil’ an neih dawn thu leh a huho emaw, chhungkua anga nei ve theuh turin Mizoram mipui an ngen.

JMC aiawh Pu Lalrammawia chuan, FCAA 2023 hì a nih ang anga Mizoram sorkarin a pawm chu Mizoram mipuite tan a him lo a, sut leh ngei tura roreltute an ngennaah an la din reng thu a sawi a; ram rorelna in sangah sût leh anih theih nan hma lak zel an tum thu sawiin, mipui tawiawmna an mamawh dawn thu a sawi a ni.

(BYTE - Lalrammawia)

Pu Lalrammawia chuan, FCAA 2023 hi Mizo mipui zawng zawng tana Dan tihbaiawm tak anih avangin FCAA adopt duh lohna leh ram roreltute chu an thu rel tawh ennawna sût leh ngei tura ngen hona leh, Article 371G chawinunna atan October ni 17. 2025 (Zirtawp) zanah hian Candle Light Vigil an neih dawn thu a sawi a; district khawpui bakah khua leh veng tinah a theih leh remchan dan anga hun lo hmang theuh turin mitin an ngen tih a sawi.



SOCIAL ACTIVIST

Social activist Pi Vanramchhuangi chuan Agriculture Minister-in tualchhung chanchinbu leh social media hrang hrangah sawhthing leina sum cheng vbc 4-5 vel chingpen a awm thu a sawi chungchangah vawiin khan Anti Corruption Bureau (ACB)-ah FIR a thehlut a, sawhthing leina sum ti chingpentute chhui chhuak ngei turin ACB a ngen.

Pi Vanramchhuangi hian a FIR thehluhah hian October ni 10 leh 11-a tualchhung chanchinbu leh social media site hrang hrangah sawhthing leina sum tihchingpen a awm thu Agriculture Minister-in a sawi tih a tarlang a; hei hi thil serious tak a nih avangin mipui sun tam tak tichingpentute chu tute pawh ni se dan anga chhui a, an phutawh hremna an hmuh ngei theih nan FIR chu a thehluh thu a tarlang.

Mipui sum tihchingpenna lian tak thleng chungchang Minister meuhin a puanzar hnu pawha chhui zui a ni lo leh thubuai siamsak an la awm lo chu thil zahthlak tak a nih thu Pi Vanramchhuangi chuan a FIR thehluhah hian a tarlang a;

He thil thleng rapthlak tak hi ACB in hma inlak loh chuan, khua leh tuite'n sorkarah rinna nghah harsa kan ti zual sawt anga, sorkar leh mipui inkar khi chat sa a zau belh ang a, kawng tinrengah Law & Order kenkawh a harsat phah ang. Chuvangin a rang thei ang bera mipui sum ti chingpentute chhuia hrem an nih ngei theih nana man chhuak ngei turin ka ngen nawn leh a che a ti bawk.



GST REFORMS

Prime Minister Narendra Modi a’n thla hmasa ni 22 a GST Rate thar a tihchhuah chuan mipuite ah hlawkna a thlen mek zel a, vawiin chuan Delhi ei leh bar a nghawng dan kan tarlang dawn a ni.

GST rate thar chuan Delhi a sumdawngte leh thilsiam chhuak tute ah hlawkna a thlen zel a, mahni kutkawih ei zawng tute ah pawhin beiseina sang tak neiin hlawkna a thlen zel a ni. Automobiles leh spare parts lam ah pawh chhiah lak ti tlem in, hralh leh lei kawng ah a hma aia hmasawnna a thlen beisei a ni.

